



## GLION

### Malegiar encunter l'uiara

Ina project dad art sin viadi viseta la claustra da Glion. A partir dalla dumengia ils 26 da fevrer 2023 presentan ils artists ucrains *Sonia Atlantova* ed *Oleksandr Klymenko* lur project che senumna: «Iconas sin chistas da munizium» ella baselgia claustrala dalla soras **dominicanas** a Glion. Sco quei che la claustra da Glion scriva en ina comunicaziun po il project artistic buc impedir l'uiara. El vul malgrad tut la miseria che l'uiara caschuna regurdar che la pasch ei pusseviva. «Ina sbrenzla da speranza che selai buca destruir.» Ils artists dalla Ucraina malegian iconas, maletgs da figuras biblicas sin chistas da munizium. Las chistas da munizium che portan alla schuldada provediment per seriscuder digl inimitg portan era destrucziun e mort. E las chistas da munizium ch'ei da lenn vesan ora empau sco vischals. Quei fatg ha intimau l'artista ed igl artist da malegiar sin las aissas da quellas chistas en stil tradiziunal iconas. «Las ovras duein purtar ils simbols dalla indestruibilidad e dalla nova veta che nescha ord la ruina.» Il recav dalla exposiziun va a favur dad in spital da voluntaris che sesanfla egl intschess d'uiara ella Ucraina. (fmr/ac)

**L'exposiziun ella baselgia claustrala a Glion cuoza entochen ils 26 da mars 2023 ed ei aviarta igl gliendisgis entochen la sonda dallas 9.00 entochen las 17.00 e la dumengia dallas 11.00 entochen las 17.00.**